

Timoteogât ekap kânok Paulonâ kulemgum pindip.

Mâsop den.

¹ Nâ Paulo, Yesu Kristogât Aposolo. Anutu kubikkubikniñâ sot Yesu Kristo gâbapkât mambât ândimen, zet Aposolo nep sâm niwet.

² Timoteo, gâ Yesugât siñgi âlip dâgoga nângâm nannâ ninâ yatâ oin. Gâgât ekap zi kulemgum gigan. Anutu Ibâ sot Kembuniñâ Yesu Kristo, zekâren gâbâ tânzângoziñgoñ, buku orotñâ sot um lumbe gâgâren zem zimbap.

Sâm gulip a, zengât den.

³ Nâ Makedonia hânân âibam op den dâgowan, zo yatâ upan. Epeso kamânân târokwap ândim a nâmbutñâ, ziñâ den siñgi âlip sâm gulipkume, zen kwâkâziñgâna birâbi. ⁴ Zen den pat yennâ sâm a tengânâ tengânâ ândim gawe, zo zengât siñgi sâm kwâkâyanğame. Anutu kubikkubikkât denñâ, zo nângâne yennâ opmap. Zen kut nâi nâi zo birâm ândibigât dâzângoban.

⁵ Siñgi âlip sâmen, zorat bonñâ itâ muyagei dâp upap. Um salek sot um kânok sot nângâm pâlâtânziñoot ândim umziñandâ gâsâyagobi. ⁶ A nâmbutñandâ mâtâp zo birâm âi gulip ândim den bon buñ sâm âragum mem ândie. ⁷ Oi ziiñangât itâ sâme, “Nen Mosegât gurumin den zorat kwâkâm ziñgâziñgân a utnat.” Yatâ sâmñâ

dinziñâ sot gurumin den zorat topñâ mân nângâm lañ sâme.

Gurumin den zo bâliñ mâme a zengât sâsâñâ.

⁸ Kembugât gurumin den Mosenâ sâip, zorat itâ nângâmen. Zo den âlipñâ. Zo sâlâpkum nângâm ândim ândiândiniñ kubikañgâm ândeindâ dâp upap. ⁹ Zorat topñâ itâ ziap. Gurumin den zo a târârakñâ zengât sinji buñâ. A itâ zo zengât sinji. Den ku a, a hurat mân kwâkwat, bâliñ mâme a, um sumun a, a zen Anutu kândâtkom hângât orot mâme zorat nângâne zâizâiñ opmap. Ibâ mam tâmbetzângozângoñ, kâmbam ku. ¹⁰ Lañ mâman a, añandik ayân bâliñ mâme. Añâ katep diim âim añgân kârâmñâ katepkât torerâpñâ zengât kât sângân nine ko katep zo zingâbat sâme. Sarâ sâsâñ a, Kembugât mâtenañ sarâ sâm kâtigime. Kut ñâi ñâi Kembugât den bonñâ kâsa miñangâmap. Kut ñâi ñâi yatâ upme, zengât op Kembugât gurumin den ziap. ¹¹ Kembuñâ zâkkât den bonñâ sapsun zingâm ândibatkât sam nigip. Zorat Anutu sâm âlip kwâkñangâmen, zâkkât sinji âlip neule âsakñoot zo a dâzângoman.

Yesuñâ Paulo tosanâ birâm nep diñ sâm pindip.

¹² Imbañâ nim mem kâtikñan nâbarip, Kembuniñâ Yesu Kristo, zâk sâiwap sâm dukuman. Zâkñâ nângânigi dâp oi nep diñ sâm nigip. ¹³ Nâ mârurnañ zâk sâm bâliñ kwâkñangâm arâpñâ zângom kâsa minzingâwan. Nâ nângâm pâlâtâññâ buñâ. Kembugât topñâ mân nângâm lâñ orâwangât um lâklâk otnim tânnom nep zo sâm nigip. ¹⁴ Kembuniñangâren

gâbâ tânzângezângezândâ nâgâren piksâi Kristo Yesu sot nângâm pâlâtân opnâ um kânok orâwan.

¹⁵ Yesu Kristo zâk bâliņ mâme a kubikningâbam hânân geip. Den zo bonnâ. Den zo a pisuk patâ ziņâ nângâm simbitkubigât âsageip. Oi bâliņ mâme a zengât patâziņâ, zo nâ. Nâ mârur yatâ op ândiwan. ¹⁶ Nâ bâliņ op ka op ândia mân birânigip. Buņâ. Yesu Kristo zâk âlip tânnogip. Zorat topnâ itâ. Tânzângezângezân, zo nâgâren pâi a zen zo eknâ nângâm pâlâtân kwâkņangâm ândiândi kâtikņan bagibigât otnigip. ¹⁷ Ândim gawe sot ândim zâinat, zorat a kutâ mân mumuņâ sot mân igikņâ, Anutu kânok, zâkkât kutsiņgiņâ zo âsak neulenoot zem zâimâmbap. Zo perâkņak.

Paulonâ Timoteo siņgi âlipkât kâwali nep tubapkât sâip.

¹⁸ Nannâ Timoteo, mârur a sâtņâ zen gâgât op Kaapungâren gâbâ den sâm muyagiwe, zorat dâgobâ. Gâ den zo nângâm kâwali nep tuum kâtigem ândiban. ¹⁹ Oi nângâm pâlâtânġâ kâtigem zeî umġâ galem otna salekkom zim-bap. A nâmbutņâ ziņâ um salek ândiândiņ birâmņâ nângâm pâlâtânziņ lorei gulipkuwe. ²⁰ Zo zengâren gâbâ nâi Hemenaiio sot nâi Alesande. A zagât zo Yesugât kâmurân gâbâ Satangât bikņan zâparâwan. Oi Satannâ sâknam ziki den bâliņzikņâ zo birâbobotkât zâparâwan.

2

Ninâugât den.

¹ Den nâmbutņâ dâzâņgobâ. Kândom ninâugât den sâbâ. Ninâu sot sâiwap den zorâņ ziiņâ sot a nâmbutņâ zengât op Anutugâren ninâu sâm ândibi. ² A kutâ sot galem a ârândâņ tânzâņgom zengât op ninâu sâbi. Oi galemnâņgone târârak ândim lumbeņâ op sândukņan ândinat. ³ Zorâņ âlip upap. Kubikkubikniņâ Anutu, zâkņâ zorat nâņgi dâp upap. ⁴ Zâkņâ a aksik patâ den bonņâ nâņgâm sumbengât siņgi upigât nâņgâmap. ⁵ Anutu kânokņak ândiap. Oi Anutu sot a osetniņan a kânokniņâ ândiap, Yesu Kristo. Zâkņâ a pisuk patâ nen sumbengât siņgi utnatkât mâtâp kubigi ziap. ⁶ Zâkņâ ândiândiņâ birâm aksik patâ nengât suupniņ meip. Zorat den siņgi sâsâņ narâk mâte oi sâne laņ kârâm ariap. ⁷ Zorat siņgi sâsâņ sot Aposolo ândibatkat gâsum sâlâpnogip. Oi hân nâin nâin gokņâ den bonņâ sot nâņgâm pâlâtâņgât topņâ kwâkâm zingâbatkat sâm nigip. (Den zo sarâ buņâ, bonņâ san.)

A ambân zengât den.

⁸ A zengât san. Zen kamân dâp um kâlak sot sarâ birâm um salek zei Anutugâren ninâu sâbi.

⁹ Zi ambân zengât san. Zen sâk pâke mem ândim urukmeruk ândine zorâņ neuleziņ upap. Oi neule top top sâņgân zâizâiņ mân pam ândibi. ¹⁰ Ambân Kembugât siņgi ândinat sâmeņâ orot mâme âlipņâ utne dâp upap. ¹¹ Ambân zen gigiņâ ândim kindap kwatne a zen Kembugât den sâne nâņgâbi. ¹² Ambânņâ a Kembugât den kwâkâm zingâbap mo a walâziņgâm den nâi sâbap, zorat nâņga dâpņâ mân uap. Zâk yen uruņsâm ândibap.

¹³ Adam zâk kândom muyageip, Ewa zâk bet. ¹⁴ Oi sarâ mariñandâ Adam mân kâitkoip. Ambân kâitkoi bâliñ oip. ¹⁵ Ambân, zâk katep mimiñangârâk ândibap, zo ko nângâm pâlâtân sot buku orot sot um salek sot gigin op ândibap. Ambân zen yatâ op ândine Anutuñâ gâsâzângobap.

3

Yesugât kâmurân a satñâ ândie, zeñgât den.

¹ Nâi zâk Yesugât kâmurân a sâtñâ ândibatkat sâbap, zâk nep âlipñangât okñangap sâsânâ. Den zo perâkñak. ² A zâk târârak ândimñâ ambân kânok sot pâlâtân ândimap. A yatâ zo a sâtñâ kwânângâban. Oi umñangât kendonagom ândibap. Mân op gulipkum, orotjik opmap. A lomba buku otziñgâm kwâkâm ziñgâziñgân nep zo târârak tuubap. ³ Too kâtik nem um gulip mân upap. Kâmbam mân kumbap. A lumberñâ op ândibap. Kât sikumgât âkñâle mân upap. ⁴ Ambâ murarâp dâñ galem otziñgâbap. Murarâp girem den dâzânçoi sât lulu op ândibi. ⁵ Nâi zâk ambâ murarâp dâñ mân galem otziñgâmap, zâk dap op Anutugât kâmut galem otziñgâbap? ⁶ Oi a nâi um kâtik ândeipñâ iraborâk Yesugât kâmurân târokwâip, zâk a sâtñâ mân kwânângâbi. A yatâ zo, zâk zâizâiñ oi Sataññâ kâitkui kek birâbap. ⁷ A kândâtñan ândie, ziñâ a nâigât nângâne dâp upap, a zorân a sâtñâ ândibap. Ziñ sâm bâliñ kwâkñangâne Satañgât ârâmbâgân gâsubapkât san.

Yesugât kâmut zorat galem a, zeñgât den.

⁸ Galem a zen yatik hâlâlu ândibi. Lâu purikgurik mân sâm ândibi. Waiņ too donbep mân nimbi. Kât sikungât âkñâle mân upi. ⁹ Den sinji âlip zem gâip, zo um salegân pane zimbap. ¹⁰ Zen kânñan mâsikâzingâm Yesugât kâmurân nep tuune âlip oi Yesugât kâmurân galem nep zo sâm zingâbi. ¹¹ Ambân Yesugât kâmut zengâren nep tuume, zen yatigâk hâlâlu ândibi. Uman pâpan mo sârân sâsâ den, den zo mân sâbi. Umziñangât kendon ândim den sânetâ bonñâ upap. ¹² Galem a ñâi, zâk ambân kânok mem zâk sot pâlâtân ândibap. Zâk murarâpñâ sot kut ñâi ñâi gakânâ dân galemziñ upap. ¹³ Galem a ñâi, zâk nepñâ tuugi âlip oi a ambân ziñ sâm âlip kwâkñangâbi. Oi zâk Yesu Kristo sot pâlâtân opñâ kenğât bun nepñâ kâwalinoot tuubap.

Sinji âlip zorat den kombânâ.

¹⁴ Nâ gâgâren kek gâbat sâm den zi kulemgum gigan. ¹⁵ Nâ kut ñâi ñâiñâ saanigi kêrep oi Anutugât kâmut zengât oserân nepkât mân kwakpangât den zi kulemgum gigan. Ândiândi mariñâ, Kambu Anutu, zâkkât kâmut nen zâkkât namâ op ândim, zâkkât den bonñâ sot kombânâ mem ândien. ¹⁶ Sinji âlipniñangât topñâ yâmbâtñâ tik pam zeip, zo Anutuñâ sâm muyageip. Zo âlipñâ sot sâtârenoot. Den zo itâ.

“Yesu zâk sâk sot âsageip. Kaapumñâ topñâ sâm muyageip. Sumbem a ziñâ igâwe. Hânñâ hânñâ a zengâren sinjiñâ sâm muyagiwe. Hân dân a zen nângâm pâlâtân kwarâwe. Neule âsakñan mem zarip.”

4

Sataŋŋâ a umziŋ mem gulipkoi siŋgi âlip kumbi.

¹ Kaapum zâk kânŋan itâ sâm muyagemap. Gâtâm narâk patâ mâte upâ sâi a nâmbutŋandâ siŋgi âlip birâm um gulip op Sataŋ sot wâke, zen sot pâlâtân op zenŋât den nâŋgâbi. ² Zo ko sarâ aŋâ umziŋâ heban oipkât a kâitziŋgom itâ dâziŋgobi, ³ “Ambân mân memŋâ sigan ândibi sot nalem nâmbut mân nem kendon ândibi.” Nen ko den bonŋâ itâ nâŋgâmen. Anutuŋâ nalem top top pam naŋgip. Oi nen zâkkâren nâŋgâm pâlâtân kwapŋâ nalem zorat sâiwap sâm ninatkât sâip. ⁴ Anutugâren gâbâ kut ŋâi ŋâi muyageip, zo âlipŋigâk. Oi sâiwap sâm mem nem ândimen oi ko zorat kwâkâkwâkânâ mân ziap. ⁵ Anutugât denŋâ sot ninâuŋandâ nalem zo mâsop mem hâlâlû pâip.

Um bâbâlaŋân nep tuunat.

⁶ Yesugât kâmut den zo dâziŋgoban zo ko Yesu Kristogât kore a sât lulu ândiban. Oi nâŋgâm pâlâtân den sot siŋgi âlip topŋâ nâŋgâm lum gâin, zorân umgan zem tângogi ândiban. ⁷ Oi gâ den pat sot ambân sombâ den lâlâlulu sâme, zo birâban. Gâ Kembangât mâtâbân târârak ândim umgâ kubikaŋgâm ândiban. ⁸ Sâkniŋâ kubikaŋgâm ândiândi, zo bâbâlaŋ sot yenŋâ yatâ. Kâ Kembangâren nâŋgâm umniŋ kubikaŋgâm ândiândiŋ, zorân bonŋâ. Zorân hânân sot sumbemân ândiândi muyageniŋgâbapkât sâsânâ. ⁹ Den zo bonŋâ. A aksik nâŋgâm naŋgânat. ¹⁰ Oi nep zorat bonŋâ minatkat sâknam nep tuum ândimen. Oi Anutu, ândiândi mariŋâ, zâkkât

nângânângâyân upmen. Zâknâ a hân dâp nen kubikniņgâbapkât imbanâ zemņanņi ândiap. A nâņgâm pâlâtânņiņoot, zâknâ perâkņak nenņât kubikkubikniņ op galemniņ opmap.

Timoteo ândi mâmanņanņât den.

¹¹ Den san, zi aksik dâzânņoban. Kut nâi nâi zo nâņgâm upigât girem dâzânņoban. ¹² Gâ a sigan op ândiatkât a ziņ gâgât nâņgâne giginâ mân upap. Gâ diņgâ sot ândi mâmangâ sot buku orotkâ, nâņgâm pâlâtânņ sot um salek ândim Yesugât kâmut zeņņât mâteziņan ândim mâtâp âlipņâ lân tirâpzânņona gekņâ yatik upi. ¹³ Nâ gâbatkât mambât ândim siņgi âlip sâlâpkum ziņņâm dâzânņom ândiban. ¹⁴ A sâtņâ zen Kaa-pungâren gâbâ gâgât den sâm muyagem bitziņâ kâukan pam mâsop mingiwe. Mâsop zo gulip opapkât mân loriban. Kâtigem nep tuuban. ¹⁵ Gâ zorat nâņgâ kwâkâ op nepkâ imbanâ tuuna bonņâ muyagei ek nâņgâbi. ¹⁶ Gâ um sâkkâ galem op siņgi âlip sâsânņ nep sâm gigip, zo ârândân galem upan. Gâ nep zo âsâbânņ tuum ândiban. Yatâ upan zo ko diņgâ nâņgâme sot gikâ ârândân ândiândi âlipņan âibi.

5

Sâm kubikkubik den.

¹ A sombâ nâi dukubam den kârâpņoot mân dukuban. Ibânâ sâm mulunâk dukuban. A katep âtâ murâpnâ sâm den dâpziņanâk dâzânņoban. ² Ambân sombâ yatigâk mamârâpnâ sâm diim gem den dâzânņoban. Ambân sâk wâņan sot

sigan, zen ponârâpnâ sâm sâkkâ galem op târârak kin den dâzângoban.

Ambân malâ, zengât den.

³ Ambân malâ sombâ, zengât den tânguban. Ambân malâ sombâ kanpitâ, zengât op san. ⁴ Malâ nâi nan bârarâp sot bagirâp ândibi oi ko zinjâ Kembugât den mem kin âse âlarâpziņ galem otziņgâbi. Oi ombenon kut nâi nâi zingâwe, zorat tosa zo zinjâ mâkâbi. Anutuņâ zorat nâņgi dâp upap. ⁵ Ambân malâ sombâ zâk zikņik ândim Anutugâren nâņgâm pâlâtâņ kwap wâratkubap. Oi âsâbâņ kut nâi nâigât kwakņâ zorat zâkkâren ninâu sâbap. Ambân malâ yatâ zo, zengât op san. ⁶ Ka ambân malâ sâk wâgân ândime, zengât girem den itâ sâban, “Zen laņ ândibi zo ko mumuņangât siņgi op ândibi.” ⁷ Ambân malâ den so dâzângom kâtigena tosa buņ ândibi. ⁸ A mo ambân nâi, zâk torerâpnâ mo ibâ mam, ambân murarâp, zo dâņ mân galem otziņgâbap, zo ko zâk siņgi âlip birâm um kâtik uap sânat. Wangât, zâk um kâtik a nâmbutuņâ walâziņgâm bâliņâ oip, zorat.

Malâ topziņ nâņgâbi.

⁹ Malâ nâi zâk kendonņâ 60 ândeip. Oi a kânok sot pâlâtâņ op ândeip, zo yatâ zo kutņâ malâ zengât ekabân pane zimbap. Malâ nâi nan bârarâp buņ sot torerâp buņ, zâk Yesugât kâmut zinjâ on galem upigât kutņâ kulemgum galem upi. ¹⁰ Oi ambân zo sât lulu nep tuugip mo buņâ, zorat topņâ nâņgâbangât sâm mâsikâziņgâban. Nan bârarâp minziņgâm dâņ galem otziņgip mo buņâ? Zâkņâ lomba a ambân buku otziņgip mo buņâ?

Yesugât sinji a on galem otziŋgip mo buŋâ? A sâknam nâŋgâne betziŋan meip mo buŋâ? Nep âlip top top zo tuugip mo buŋâ? Nep top top zo tuugi ikne âlip oi topŋâ ekabân kulemgubi.

¹¹ Malâ sâk wâgân zen kutziŋâ malâ zengât ekabân panâ sâne kwâkâziŋgâban. Zen yatâ zorâŋ laŋ ândiândiŋangât otziŋgi a minam Kristo kândâtkubi. ¹² Oi mârûm Kembangât nep tuubigât den sâwe, zo loŋgiŋne tosaŋoot opmap. ¹³ Oi zorik buŋâ. Nepkât mân nâŋgâm mirâ lâkŋan nem obândime. Oi zorik buŋâ. Den bon buŋ sot den bâliŋâ laŋ sâme. ¹⁴ Zorat nâ itâ san. Malâ sâk wâgân ziŋ a dum mem murarâ minziŋgâm mirâ umŋan ândie, zen on galem otziŋgâbi. Yatâ op ândine kâsa ziŋ sâm bâliŋ kwatniŋgânam den kârûm birâbi. ¹⁵ Malâ nâmbutŋandâ mârûm mâtâp âlipŋâ birâm Sataŋgât mâtâbân âiwe, zorat nâ yatâ san. ¹⁶ Yesugât kâmurân ambân ŋâi zâkkât toren malâ ŋâi ândibap zo ko zâk on galem upap. Yesugât kâmut zen ambân malâ zo mân galemgubi. Torerâp ândie, ziŋâ galem upi. Ka malâ ŋâi torerâpziŋ buŋâ zo ko kâmut ziŋ galem otziŋgâbi.

Galem a, zengât den.

¹⁷ Galem a, ziŋâ Kembangât nep kâtigem tuune âlip oi kut ŋâi mem zâi pam otziŋgâbi. Sinji âlip sâme sot kwâkâm ziŋgâme, a zo yatâ otziŋgâbi.

¹⁸ Galem a ziŋ nepkât sâŋgân mimbi, zorat Kembangât ekabân den ŋâi itâ ziap,

“Wâugandâ zuu zigi mem ko kembi mân pindâna mân dâp upap.”

Oi den ŋâi itâ,

“Nep a zâk nepkât sângân mei dâp upap.”

¹⁹ A kânoknâ galem a nâi denân pambâ sâi mân nângâbi. A zagât mo karâmbut ziñâ den sâsânangât sâne nepnâ tuuban. ²⁰ Galem a nâinâ bâliñ op mân biri a kâmut zengât mâteziñan den sâm kubiknangâna nâmbutnâ ziñâ ekñâ kengât upi.

²¹ Nâ Anutu sot Yesu Kristo sot sumbem arâpnâ zengât mâteziñan itâ sâm kâtigian. Den dâgogan, zi dâñâk galem otna nâi mân gibap. Oi umgangârâk a ambân lañ mân otziñgâban. Hâtubâtu mân otziñgâban. ²² Gâ a nepkât mâsop kâukziñan bikâ kek mân pâmban. Zâk zengât tosanâ gâgâren zâibapkât yatâ upan. Um sâkkâ galem otna salekkom zimbap.

Mâsekât den sot bâliñangât den.

²³ Gâ umgan mâsek âsâban muyagemap, zorat tooyak mân nimban. Waiñ too mâik nâi nena âlip upap.

²⁴ Narâk ziren a nâmbutnâ bâliñâ utne sinniñandâ ikmen. Ekñâ hâuñâ mimiñangât sinji sâmen. A nâmbutnâ ko bâliñâziñâ tik ziap. Zo beknan muyagei hâuñâ mimbî. ²⁵ Orot mâme âlip zo yatik muyagemap. Tik ziap, zo yatik mân zimbap. Zo bet muyagem nanngâbap.

6

Kore mâman a, zengât den.

¹ Kore mâman ândime, zen patârâpziñâ hurat kwatziñgâm dinziñ lubi. Anutugât den sot kutnâ sâm bâliñ kwapegât yatâ upi. ² Kore a nâmbutnâ patârâpziñâ Kembangât sinji ândime,

zen mân mem gei kwatziŋgâbi. Zen Kembugât opŋâ buku kânok uen sâmŋâ mân mem gei kwatziŋgâbi. Patârâpziŋ zen Kembu nâŋgâm pâlâtân kwâkŋaŋgâne buku otziŋgâmap, zorat opŋâ um bâbâlaŋân kore otziŋgâne dâp upap. Gâ den zi dâzâŋgona nâŋgâm yatik op ândibi.

Kât sikum laŋ mân mimban.

³ A ñâi, zâk sâm gulip den ñâi sâm Kembuniŋâ Yesu Kristo, zâkkât den âlipŋâ birâm ñâi sâbap, zâkkât itâ sânat, ⁴ “Zâk um gulip op sâkŋâ mem zâim den bon mân nâŋgâm den yenŋâ laŋ sap.” Den zorat bonŋâ itâ. Den sârek, um kâlak, sâm bâliŋ kwâkwat, den sâgân sâsân. ⁵ Oi den sâm kwâkâkwâkâŋ muyagemap. A zo umziŋ gulip oi nâŋgânâŋgâziŋ buŋ oi kât sikum muya-geŋiŋgâbap sâm Kembugât kâmurân ândie.

⁶ Kembu sot pâlâtân oindâ tânnâŋgoi nâŋgindâ umniŋ âkâbap. ⁷ Nen itâ nâŋgâmen. Nen muyagem hânân bet bâsaŋ gawen. Oi zo yatik momŋâ bet bâsaŋ âinat. ⁸ Zorat hânân zi naleme sot sâk pâke zemniŋgi nâŋgindâ âki ândinat. ⁹ Kât sikum patâ minatkât sâme, zen sarâ mariŋaŋgât ârâmbâgân zâibi. Oi kut ñâi yenŋâ sot bâliŋâ top topŋaŋgât âkŋâle muyagem zorat nâŋgânâ sâm tâmbetagobi. ¹⁰ Kât sikumgât âkŋâleŋâ bâliŋâ top top zorat topŋâ uap. Oi a nâmbutŋandâ zorat opŋâ siŋgi âlip kândâtkom zoren bagim umbâlâ muyagiwe.

Ândiândi kâtikŋaŋgât kâtigibi.

¹¹ Anutugât siŋgi a, gâ kut ñâi ñâi zo birâban. Gâ âlip opŋâ târârak ândiândiŋ sot siŋgi âlip sot

nângâm pâlâtân sot buku orot, kâtigiginâ sot lâlon kwatziŋgâziŋgânŋgât kâtigiban. ¹² Oi gâ nâŋgâm pâlâtânŋât nep âlip tuuban. Tuum âim ândiândi kâtiknâ gâsuban. Gâ zorat op diigigip. Gikak yatâ upangât a donbep mâteziŋan sâŋ kâtigena nâŋgâwe.

¹³ Anutuŋâ kut nâi nâi ândiândi muyageziŋgâmap, zâkkât mâtenan sot Yesu Kristo a kutâ Pontio Pilato mâtenan sâŋ kâtigeip, zekât mâtezikan itâ sâŋ, sâŋ kâtigem dâgobâ. ¹⁴ Gâ den kâtik sâŋ gigip, zo mem târârak kinna Kembuniŋâ Yesu Kristo gâbap. ¹⁵ Zorat narâknâ mâte oi imbanâ mariŋâ, a kutâ sot a zâizâiŋ aksik zenŋât Kembu patâziŋ, Anutu, zâknâ hanŋi mori Kembuniŋâ Yesu takâbap. ¹⁶ Anutu zâk ziknik mumuŋâ buŋâ. Zâk âsaknâ umŋan ândiap. Gootŋan mân âibemgât dâp. Anâ mân igâwe. Zâk mân ikpemgât dâp. Sâŋ âlip sot Kembu nepnâ memnâ ândim zâimâmbap. Perâknak.

Kombânŋâ zinzin kâtik muyaginat.

¹⁷ A kât sikum patâ zemziŋgap, zen girem dâzânŋona sâkziŋ mân mem zâibi. Kut nâi nâi buŋ orot, zorat nâŋgâne zorân kombânziŋ oi zoren mân kâtigibi. Anutuŋâ gom sambe muyageniŋi mem nem sâtâre op ândien, zorat nen zâkkâren nâŋgâm pâlâtân kwâknâŋgâm ândinat. ¹⁸ Oi sâŋ ziŋgâna âlipnâŋgât nep tuum umâlepkât op kut nâi nâiziŋ kâsâpkum a kanpitâ ziŋgâm ândibi. Oi siŋi âlipkât bonnâ muyagibi. ¹⁹ Yatâ opnâ kombânziŋ nâi zinzin kâtik memnâ ândiândi mimbî. Ândiândi zo bonnâ.

Timoteogât girem den

²⁰ O Timoteo, gâ Kembangât den gigip, zo dân galem gum mem ândiban. Oi a nâmbutņandâ nen nâņgânâņgâniņoot sâ m den yennâ mo bon buņ zo sâne nâņgâm kubik birâban. ²¹ A nâmbutņâ den zoren mândâm nâņgâm pâlâtâņgât mâtâp birâwe.

Anutugâren gâbâ tânzâņgozâņgoņ zo zengâren zimbap.

Zo yatik.

SINGI ÂLIP EKAP
The New Testament in the Komba Language of Papua
New Guinea
Nupela Testamen long tokples Komba long Niugini
copyright © 1980 Wycliffe Bible Translators, Inc.

Language: Komba

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-01-06

PDF generated using Haiola and XeLaTeX on 21 Feb 2024 from source files dated 31 Aug 2023

8e5b8dff-a54f-5e56-9b8c-1906f06b22d1